



Selasa, 31 Oktober 2023

Ogen : Roma 12:2



Perukuren Si Ipelimbarui Dibata



Reformasi gereja, 31 Oktober 1517, ipelopori Martin Luther, Calvin ras Juingly. Kalak enda pelain-lain kuta tapi sada pengangkanna kerna keselamatan e erkiteken perkuah ate. Paksa si e lit pengajaren gereja si lanai seri ras pengajaren Pustaka Si Badia. I ja pemimpin gereja katolik mereken pengajaren maka manusia selamat labo erkiteken perkuah ate tapi arah perbahanenna. Manusia si enggo erdosa banci selamat adi itukurna surat penghapusan siksa (indulgensia). Kai si ikatakenna e enggo petembil ras isi Pustaka si Badia. Tambah si e, si erdahin i bas Gereja pe enggo melala biakna medoni. Nggit nogok ras ngaloken sogok gelah tetap jadi pejabat Gereja. Pengajaren ras perbahanen si bage me si man pekenan. Labo ate Martin Luther ndarat i bas gereja Katolik nari tapi mpekana (meluruskan) pengajaren e gelah mulihken ku Pustaka Si Badia. Lit telu motto Reformasi: *Sola fide* (terkelin erkiteken kiniteken), *Sola gracia* (terkelin erkiteken perkuah ate) ras *Sola scriptura* (kiniteken ras perkuah ate banci si eteh arah Pustaka Si Badia). Paulus pe ngerana kerna reformasi man perpulungen i Roma. 'Ula Pelepas dirindu jadi seri ras doni enda, tapi berelah perukurenndu ipelimbarui Dibata." Ipake Paulus i je kata ipelimbarui, ertina ipekena, irubah, isalihken ku si mehuli. Si perlu labo terjeng perubahanen si arah darat, tapi i bas pusuh nari (perubahan akal budi). Pengajaren si payo i bas pusuh teridah arah perbahanen si payo.

Adi kata Dibata kin si ringan i bas pusuh, teridah nge arah perbahanennta. Lanai kita seri ras perbahanen doni si biakna ngukuri dirina jine. Engkai maka perlu kata Dibata e ringan i bas pusuh? Gelah si eteh apai si ngena ate Dibata guna ilakoken i bas kegeluhen. Kata Dibata e ngenca ngasup nuduhkan sura-sura Dibata man banta. Kata Dibata e banci lalap si oge arah Pustaka si Badia. Si nggeluh i bas Kata Dibata, pusuh ras perbahanenna lalap ipelimbarui.